

Deporte Local

AVB ta bay sigui inverti den nos mucha y hobennan futbolista



ORANJESTAD(AAN): Recientemente David "Appie" Abdul a wordo nombra coordinador nobo di Arubaanse Voetbal Bond (AVB) y como tal DIARIO den un entrevista a puntra e ex hungador profesional di Sparta, con ta bayendo cu e talentonan di futbol di Aruba y kico ta e posibilidadnan pa quizas talentonan di Aruba logra drenta un equipo profesional na Hulanda of

otro pais Europeo. Abdul a splica cu ora cu e tabata tin 16 aña el a sali for di Aruba pa bay haci un tryout cerca Sparta di Eredivisie na Hulanda y despues di hunga 2 aña den nan equipo hubenil, el a hunga 3 aña den e equipo principal di Sparta. Esey a pone cu entre otro el a hunga contra Luis Suarez, kende e tempo ey tabata hunga pa Ajax. Segun Abdul, no ta facil

pa bay Hulanda y bira profesional, pasobra na Hulanda tin masha hopi mucha mes ta practica e deporte, cu ta esun mas popular den e pais. "Tin hopi talento na Hulanda, pues pa un hoben bin di otro pais y haya un oportunidad, e mester ta hopi excepcional", segun Abdul, kende a indica cu apesar cu na Aruba tin hungador talentoso, quizas ta mihor pa nan

cuminza den nos region mes.

El a splica cu Aruba Soccer Academy (ASA) mes a yega di manda un total di 12 mucha pa Hulanda den ultimo 3 aña y mey pa tryout y ningun di nan a logra, cu excepcion di un mucha di Boneiro.

Sinembargo, e coordinador di AVB a bisa cu e muchanan na Aruba mester sigui keda positivo, pasobra Aruba tin talentonan cu si nan traha duro por yega leu.

Segun Abdul, muchanan di Aruba cu talento por purba drenta un equipo den Latino America, Centro America of MLS na Merca.

For di eynan semper bo por yega Europa, mescos cu hopi hungador cu a cuminsa hunga por ehempel na Brazil, Uruguay, Argentina etc.

E posibilidad di MLS ta uno hopi bon segun e entrenador, mirando cu bo lo por combina esaki cu un beca (scholarship).

DIARIO a puntra Abdul tocante di e parti di scouting di AVB y el a splica cu AVB ta bezig cu un sistema nobo yama 'Spelervolgsysteem'.

Den e sistema aki tur data di e hungadornan ta

wordo hinca, incluyendo cuanto minuut nan a hunga, ken a hinca gol, ken a duna un asistencia, ken a ricibi un carchi geel/cora etc.

Aworaki cu e sistema no ta cla ainda, Abdul sa bay wak diferente wegá y e ta papia cu e coachnan di equipo, ora cu e tin bista riba hungadornan cu posiblemente por wordo acerca pa drenta den e seleccion nacional di Aruba.

Especialmente ta bezig ta scout hungadornan pa U-20 cu tin cu bay viaha dentro di poco pa hunga contra Mexico, Canada y El Salvador.

DIARIO a puntra Abdul riba e posibilidadnan pa Aruba crece den futbol mundial.

El a splica cu AVB ta inverti hopi den e hungadornan chikito y pesey dentro di poco lo bin cu un AVB Academy, di cual e mes ta bay ta coordinador.

E intencion ta pa banda di e training di e teamnan di e muchanan, lo duna nan mas training, unda cu na dado momento e mucha y hobennan ta 5 pa 6 dia pa siman ta ocupa cu futbol. Mas biaha bo train mas mihor bo por desaroya bo mes y mas leu bo por yega como hungador.

